

ZAPISNIK
O RADU 20. RADNE SJEDNICE SKUPŠTINE KANTONA SARAJEVO ODRŽANE
14.03.2025.GODINE SA POČETKOM RADA U 10,00 SATI

Dvadesetu radnu sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici su prilikom otvaranja prisustvovali 24 zastupnice i zastupnika, dok su se ostali priključili u toku sjednice. Izostanak sa ove sjednice opravdali su zastupnici: Elza Gaković, Vedrana Vikić Musić i Albin Zuhrić. Sjednici nisu prisustvovali zastupnici: Bešlija Vildana, Izetbegović Sebija, Pekić Jelena i Zahiragić Haris.

U skladu s naprijed iznesenim, prisustvo zastupnika 20. Radnoj sjednici je bilo sljedeće:

SDA - STRANKA DEMOKRATSKE AKCIJE

1. Dević Mahir
2. Kalem Adi
3. Kapidžić Faruk
4. Selmanović Faruk
5. Viteškić Smiljana

POLITIČKA ORGANIZACIJA "NAROD I PRAVDA"

1. Čampara Aljoša
2. Kristić Danijela
3. Mehmedagić Mersiha
4. Okerić Elvedin
5. Pobrić Rusmir
6. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čičić Davor
3. Kapo Belma
4. Petrović Kristina

POLITIČKA ORGANIZACIJA GRAĐANA "NAŠA STRANKA"

1. Handžić Vibor
2. Klarić Sanela
3. Melank Miomirka

STRANKA ZA BOSNU I HERCEGOVINU

1. Bandić Muamer
2. Gavrankapetanović-Smailbegović Fatima
3. Šaljić Jasmin

DEMOKRATSKA FRONTA

1. Hašimbegović Marijela
2. Pilav Ilijaz
3. Vujović Vedrana

POLITIČKA ORGANIZACIJA/INICIJATIVA “ZA NOVE GENERACIJE”

1. Marjanović Damir

SAMOSTALNI ZASTUPNICI

1. Hodžić Admela
2. Lemezan Redžo
3. Memić Arijana

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a R BiH koji su dali svoje živote u odbrani od agresije na Bosnu i Hercegovinu, svako na svoj način.

U radnom dijelu sjednice, predsjedavajući je istakao da je Prijedlog dnevnog reda 20. Radne sjednice Skupštine Kantona Sarajevo utvrdio Kolegij Skupštine na sjednici održanoj 05.03.2025.godine.

Nakon čitanja dnevnog reda, predsjedavajući je pozvao zastupnike da se izjasne o istom.

Na osnovu rezultata glasanja, konstatovano je da je Dnevni red 20. Radne sjednice Skupštine Kantona Sarajevo usvojen jednoglasno (s 23 glasa „za“), i isti glasi:

1. Poslanička/zastupnička pitanja inicijative i odgovori;
2. Prijedlog Odluke o potvrđivanju smjene ministra u Vladi Kantona Sarajevo;
3. Prijedlog Odluke o imenovanju pravobranioca Pravobranilaštva Kantona Sarajevo

TOK SJEDNICE

Realizacija prve tačke dnevnog reda.

AD – 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je otvorio tačku dnevnog reda i dao riječ prvoj prijavljenoj zastupnici, Belmi Kapo.

Zastupnica Belma Kapo je podnijela sljedeće (citiramo): „Ja podnosim inicijativu prema ministrici osnovnog odgoja i obrazovanja Naidi Hota-Muminović, a ona se odnosi na izmjenu Pravilnika u kome je definisana mogućnost roditelja da opravdaju dječji izostanak u toku jednog polugodišta. Ja sam dobila odgovor od Ministarstva gdje su oni obrazložili zašto ne mogu povećati broj opravdanih dana u jednom polugodištu na 5. U obrazloženju su se pozvali na najbolji interes djeteta i Konvenciju o pravima, dječjim pravima, pa bih ja, evo, zamolila našu uvaženu ministricu ako može, još jednom, samo da preispitaju svoju odluku. Mislim da im se obratila Javna ustanova Dom zdravlja Kantona Sarajevo, Vijeće roditelja. Ukoliko postoji ikakav prostor da ovdje napravimo jedan iskorak, da olakšamo cijelom i zdravstvenom sistemu i roditeljima i školama. Mislim lično, ali evo, ne bih se svakako uplitala u rad samog Ministarstva

da to neće, povećanje tih broja dana na 5 u jednom polugodištu zasigurno neće ni na koji način oštetiti obrazovni sistem, a jako bi pomoglo i roditeljima i zdravstvenom sistemu, posebno u ovim zimskim periodima, kada imamo ogromnu cirkulaciju virusa, pa bih, evo, zamolila uvaženu ministricu ako može još jednom da preispitaju svoju odluku i ako može, da ovdje ipak izađu u susret evo cijelom ovom sistemu. Ako je moguće usmeni odgovor, ako nije, onda svakako u pismenoj formi.“

Zastupnica Miomirka Melank je podnijela sljedeće (citiramo): „Građani su mi uputili molbu da predložim inicijativu za izmjenu starosne granice u Pravilniku o uvjetima za izbor predstavnika etažnih vlasnika. Član 2. Pravilnika definiše limit od 70 godina za izabranog predstavnika etažnih vlasnika i 65 godina za predstavnika koji se bira po javnom pozivu. Smatram da je ova odredba diskriminatorna i da bi je trebalo ukinuti jer građanima uskraćuje pravo na aktivno učešće u svojoj stambenoj zajednici isključivo na osnovu starosne dobe, a ne prema njihovoj stvarnoj sposobnosti. Članom 3. Pravilnika definisani su posebni uvjeti, između ostalog i da je položio test za obavljanje poslova predstavnika etažnih vlasnika, što smatram dovoljnim kriterijem za ispunjavanje uslova. Ombudsmeni su već ukazali na slične slučajeve diskriminacije kao što je bilo ograničavanje radnog vijeka ljekarima. Praksa je pokazala da su ograničenja diskriminatorna u slučaju kada drugi kriteriji budu zadovoljeni. Tako je prema preporuci ombudsmana, zabrana rada ljekarima starijim od 75 godina ukinuta. Ako su doktori sposobni da rade u tim godinama, ne postoji opravdan razlog zašto ne bi mogli i raditi etažni vlasnici po ovom istom principu. Dešava se, naime, da nekada budu imenovane osobe za predstavnike koji potpuno na drugoj adresi stanuju jer među stanarima ne mogu se pronaći adekvatno i onda neki poslovi kasne mjesecima, ne mogu da se obave zbog toga što ne postoje unutar ulaza ili zgrade etažnih vlasnika izabran predstavnik“.

Zastupnica Vedrana Vujović je podnijela sljedeće (citiramo): „Danas upućujem zastupničku inicijativu prema Ministarstvu zdravstva i Kantonalnoj upravi za inspeksijske poslove za dostavu sveobuhvatne informacije i provedbu inspeksijskog nadzora na Kliničkom centru Univerziteta u Sarajevu povodom informacija koje su se pojavile u javnosti, a tiču se beba rođenih na Klinci za ginekologiju i akušerstvo Kliničkog centra kojima je dijagnosticirao meningitis netom po izlasku iz porodilišta te su primljeni na Odjel neonatologije početkom januara 2025. godine. Od izuzetne je važnosti ovom problemu pristupiti odgovorno, stručno i transparentno te blagovremeno i preventivno djelovati i sve posljedice efikasno sanirati. Napominjem da su ove informacije uznemirile javnost da po provedbi inspeksijskog nadzora i utvrđivanja svih relevantnih činjenica očekujem da Vlada Kantona Sarajevo o istom izvijesti i Skupštinu Kantona Sarajevo, ali i širu javnost. Dalje, upućujem zastupničko pitanje premijeru Kantona Sarajevo i Direkciji za robne rezerve koji je razlog zašto u skupštinsku proceduru još uvijek nije upućen Prijedlog Zakona o robnim rezervama Kantona Sarajevo? Podsjetit ću vas da je Vlada Kantona Sarajevo u julu 2022. godine utvrdila Nacrt Zakona o robnim rezervama, a više od godinu dana kasnije, 4.10.2023. godine, prihvatila ga je i Skupština i uputila u javnu raspravu u trajanju od 60 dana. Godinu dana nakon toga, 27.11.2024. godine, Direkcija za robne rezerve uputila je javni poziv na konsultacije povodom Prijedloga zakona, a koje su završene 10. 12. 2024. godine i do danas taj zakon, odnosno Prijedlog zakona, još uvijek nije u skupštinskoj proceduri. Imajući u vidu sve ovo što sam rekla, očekujem usmeni odgovor od premijera koji ovdje prisutan i pismeni odgovor od direktorice Direkcije. Također, još jedno pitanje na koje tražim usmeni odgovor je kada ćemo imati Prijedlog budžeta u skupštinskoj proceduri? To je pitanje i za premijera Kantona, ali i za ministra financija na koje tražim usmeni odgovor. I evo iskoristit ću, s obzirom da poslovnički nemam mogućnost molbe, ali evo da ne bi upućivala inicijativu, zaista da zamolim Ministarstvo zdravstva i sve javne zdravstvene ustanove da, blagovremeno i da adekvatno planiraju javne nabavke kako se više ne bi događalo da ponovno imamo situaciju sa žalbenim postupkom, da nema reagenasa na Kliničkom centru za PET CT preglede“.

Zastupnik Faruk Selmanović je podnio sljedeće (citiramo): „Imam pitanje. Znači moje pitanje upućujem Vladi Kantona Sarajeva, Ministarstvu komunalne privrede i infrastrukture, prostornog uređenja, građane i zaštita okoliša Kantona Sarajeva i Uredu za borbu protiv korupcije i upravljanja kvalitetom u Kantonu Sarajevo. Od premijera Kantona Sarajevo i v.d. ministra komunalne privrede i infrastrukture prostornog uređenja građenja i zaštita okoliša tražim odgovore na pitanje da li je ugovor o poslovnoj saradnji koji je zaključen između Kantonalnog javnog komunalnog preduzeća RAD Sarajevo i privatne firme Eko pak doo. Sarajevo, kojim se vrši nabavka 100 komada kontejnera, zaključen u skladu sa Zakonom o javnim nabavkama i drugim relevantnim zakonskim i podzakonskim propisima? Pa molim pismeni odgovor na ovo. A moje drugo pitanje ide Uredu za borbu protiv korupcije i upravljanja kvalitetom da, polazeći od navoda iz pitanja koje sam uputio premijeru Kantona Sarajevo, i v.d. ministru komunalne privrede, provede postupak istrage na okolnosti zakonitosti nabavke 100 komada kontejnera iz člana 1. Sporazuma o poslovnoj saradnji koji je zaključen između Kantonalnog javnog komunalnog preduzeća RAD i privatne firme Eko pak do. Sarajevo.

Također, na zamolbu stanara iz Ulice Gandijeva, od broja 1 do broja 4. Sarajevo, upućujem inicijativu Ministarstvu komunalne privrede, infrastrukture, prostornog uređenja i građenja i zaštite okoliša Kantona Sarajeva. Naime, stanari zgrade u Ulici Gandijeva od broja 1 do broja 4, Sarajevo, već duži niz godina imaju problem sa prokišnjavanjem te je situacija postala alarmantna. Zbog prodora vode u stanove na niže spratove, zdravlje stanara postaje ugroženo radi pojave vlage, dok se s druge strane smanjuje sigurnost jer kontinuiran prodor vode može doći do većih oštećenja stambenih jedinica. Upućujem inicijativu da se iznađu sredstva za sufinansiranje rekonstrukcije krova koji je star preko 30 godina, a za ovaj projekat je izrazila spremnost i lokalni organi vlasti da učestvuju u realizaciji istog.“

Zastupnica Mersiha Mehmedagić je podnijela sljedeće (citiramo): „Imam pitanje koje upućujem Kantonalnoj upravi za inspeksijske poslove. Naime, tražim da mi dostave preglede inspeksijskih nadzora sa podacima o predmetu nadzora, izrečenim mjerama za sva poduzeća iz oblasti privrede i komunalne privrede za 2024. godinu i zaključno sa danom podnošenja inicijative za 2025. godinu“.

Zastupnica Fatima Gavrankapetanović-Smailbegović je podnijela sljedeće (citiramo): „Ja danas imam jednu inicijativu za ministra zdravstva dr Enisa Hasanovića, a to je da se na Kliničkom centru na lokalitetu Jezero postavi jedan CT aparat i aparat za magnetnu rezonancu. Na lokalitetu Jezero nalaze se tri klinike sa velikim brojem hospitaliziranih pacijenata, od kojih mnogi moraju raditi upravo tu dijagnostiku. Sada se hospitalizirana djeca, trudnice, žene sa ginekološkim oboljenjima prevoze na Klinički centar, a nakon urađene dijagnostike vraćaju se na lokalitet Jezero. Nekada to bude po jako niskim temperaturama, nekada se moraju uraditi hitna dijagnostika, pa se u prijevozu može izgubiti dragocjeno vrijeme. Smatram da bi se postavljanjem ova dva aparata na lokalitet Jezero uveliko olakšalo i pacijentima, a i doktorima i medicinskim sestrama koji idu u pratnje pacijenata. Također, imam pitanja za ministra zdravstva da li imate informaciju kada će proraditi PET CT aparat na Kliničkom centru i da li se mogu prevazići administrativne barijere kod nabavki reagensa koji su neophodni za izvođenje ove pretrage. Veliki broj pacijenata zahtjeva ovu vrstu dijagnostike i ne smijemo dozvoliti da se prave liste čekanja, pogotovo ne za onkološke pacijente. Zahvaljujem se i molim usmeni odgovor“.

Zastupnica Marijela Hašimbegović je podnijela sljedeće (citiramo): „Za ovu sjednicu pripremila sam 6 inicijativa i 2 pitanja. Prezentirati ću jednu inicijativu koja je upućena Vladi Kantona Sarajevo i Ministarstvu za odgoj i obrazovanje, dakle inicijativa se odnosi na stavljanje van snage suglasnosti za dokument instrukcije o postupanju o slučaju izricanja odgojno disciplinske mjere isključenje iz srednje škole koju je donijelo Ministarstvo za odgoj i obrazovanje. Instrukcija za koju je Vlada dala saglasnost je neustavna i protuzakonita, ona je u

koliziji sa Pravilnikom o izricanju odgojno disciplinskih mjera u osnovnim i srednjim školama. Višestruke su povrede zakona u smislu ustupanja nadležnosti za sprovođenje postupka nakon isključenja iz škole institucijama koje pravno formalno ne mogu izvršiti ovakve aktivnosti. Nadležnost resornog ministra, ministrice koji se uvodi u smislu izdavanja rješenja za isključenje kojim se upisuje učenik u škole, za što nema ustavnu i zakonsku nadležnost. Ujedno, ovdje se radi i o pravnom neredu u kontekstu ukidanja žalbe kao pravnog lijeka. Nije propisana dvostepenost postupka uz grubo kršenje ljudskih prava koja su propisana Europskom konvencijom o ljudskim pravima. Ujedno, instrukcija je potpuno nejasna jer nisu definisane odredbe ko i pod kojim uslovima se može isključiti iz škole, da li se učenik može isključiti 3 mjeseca prije završetka školske godine, da li se može isključiti učenik kome je izrečena mjera isključenja iz škole i koji su pod posebnim programom IPP-a i IPB-a propisanih pravilnikom, iz škole u kojoj je napravio težu povredu učeničke dužnosti ranije od 3 mjeseca, koliko jeste propisano, bez obzira kakav je prekršaj učinio. Očekujem da će Vlada Kantona Sarajevo preispitati svoju odluku po pitanju izdavanja saglasnosti na predmetnu instrukciju. Zakon o odgoju i obrazovanju u osnovnoj i srednjoj školi u Kantonu Sarajevo, u članu 94. stav (1) propisuje šta su teže povrede učeničke dužnosti, dok se lakše propisuju pravilima škole. Zakon je članom 74. i 75. propisao da će Ministarstvo izraditi propise o načinu postupanja u preduzimanju mjera zaštite prava učenika te prijave kršenja tih prava nadležnim tijelima. Ministarstvo donosi dokument Pravilnik o izricanju odgojno disciplinskih mjera u osnovnim i srednjim školama koje propisuju vrstu odgojno-disciplinske mjere, način izricanja izrade IPP-a i IPB-a za učenike koji imaju izrečenu mjeru premještanja u drugu najbližu osnovnu školu na području opštine ili Kantona ili mjeru isključenja iz škole koja je u koliziji sa dokumentom Instrukcija. Pravilnik članom 10. stav (1) propisuje da se IPP i IPB realizuje sa učenicima najmanje 3 mjeseca dok instrukcija, članom 4 propisuje da su u roku od 15 dana. Na kraju, reći ću samo da li su ovako propisani načini prebacivanja učenika iz škole u školu bez mogućnosti žalbe zadovoljava najbolji interes djeteta propisan Konvencijom o pravima djeteta, često spominjan u instrukcijama i pravilnicima. Zaštita djeteta i njegova sigurnost i prava moraju biti jasno precizirana u skladu sa drugim važećim propisima i zakonima”.

Zastupnik Adi Kalem je podnio sljedeće (citiramo): „Naime, ja sam za danas pripremio jednu inicijativu i 2 pitanja, a tiču se javnog prijevoza putnika u Kantonu Sarajevo. Na današnjoj sjednici podnosim inicijativu za izmjenu rute kretanja minibusa na liniji Pazarić - Osenik. Lokalna zajednica se i ranije obraćala po ovom pitanju i dok sam i ja bio tu, u Ministarstvu, uglavnom, na osnovu ranijih zahtjeva Općinskog vijeća Hadžići i Savjeta Mjesne zajednice Pazarić, te inicijative pokrenute 2020 godine, podnosim inicijativu za izmjenu rute minibuske linije broj 57, Pazarić-Osenik kako bi se omogućilo njeno kretanje kroz naselje Resnik. S obzirom da su sada stvoreni svi infrastrukturni uslovi za realizaciju ove izmjene i uključujući izgradnju dva autobuska stajališta u suradnji sa Općinom Hadžići, smatram da je neophodno što prije izvršiti prilagodbu rute i da se uspostavi nova trasa kretanja kako bi djeca Resnika, odnosno naselja Resnik mogla bezbjedno stići do škole. Ovu inicijativu upućen Ministarstvu saobraćaja Kantona Sarajevo i Kantonalnom javnom komunalnom preduzeću Gras doo. Sarajevo. Također, vezano za ovaj istu rutu minibusa 57, postavljam pitanje Ministarstvu saobraćaja, Grasu i Kantonalnoj upravi za inspeksijske poslove do kada će djeca Osnovne škole "9. maj" Pazarić, koja putuju ovim minibusom biti taoci neadekvatnog, neadekvatno prilagođenog reda vožnje ovog minibusa, obzirom da u posljednje vrijeme u razgovorima sa građanima Pazarića, predstavnicima Savjeta Mjesne zajednice imam određena saznanja, odnosno određene informacije da isti taj minibus kreće puno ranije nego kada se djeca puste sa časa, zadnjeg časa. Također, zamolio bih i postavljam pitanje Ministarstvu saobraćaja i Centrotransu, a tiče se minibuske linije Hadžići-Mokrine, je li, većina nas, dosta nas zastupnika je podnosila inicijativu na ovu temu i na nedostatak ovog minibusa, evo, hvala Bogu, on je profunkcionisao, međutim, izgleda da red vožnje nije usuglašen sa potrebama djece i stanovnika tog kraja, pa bih zamolio kada možemo, zamolio, znači i ministarstvo i Centrotrans, kada očekujemo da će zajedno sa rukovodstvom škole

i savjetima mesnih zajednica kroz koje prolazi ovaj minibus, imati, da tako kažem, adekvatan red vožnje koji će zadovoljiti sve potrebe građana , al' prvenstveno djece ove Osnovne škole ”.

Zastupnica Arijana Memić je podnijela sljedeće (citiramo): „Ja ću imati nekoliko pitanja za Općinski sud u Sarajevu, tačnije Prekršajno odjeljenje u vezi sa primjenom zaštitnih mjera u slučajevima nasilja u porodici. Želim postaviti pitanje u vezi učestalošću, efektima izricanja određenih mjera. Koliko puta su u posljednjih 5 godina izrečene mjere udaljenja počinitelja nasilja iz stana i psihosocijalnog tretmana u slučajevima nasilja u porodici, koliko od tih izrečenih mjera je prekršeno nakon što su donesene? Vezano za kaznenu odgovornost u slučajevima neplaćanja alimentacije. Dakle, prema vašoj evidenciji da li je neko osuđen zbog neizdržavanja, to jest zbog neplaćanja alimentacije, odnosno jesu li i koje kazne izrečene osobama koje nisu izvršavale svoje obaveze u vezi sa plaćanjem alimentacije? Podnosim inicijativu prema Ministarstvu unutrašnjih poslova Kantona Sarajevo za poboljšanje kvalitete materijala od kojih se izrađuje oružni listovi u Kantonu Sarajevo te da se razmotri uvođenje QR coda za ličnu, za lakšu provjeru autentičnosti. Trenutni materijal je izuzetno podložan oštećenjima, što otežava njegovu dugoročnu upotrebu. Kako bi se osigurala veća trajnost i sigurnost oružnih listova, potrebno je razmotriti mogućnost zamjene materijala te da se umjesto sadašnjeg kartonskog papira koristi plastificirana kartica poput onih koji se koristi za vozačke dozvole ili lične karte. Također, uvođenjem QR kodova za oružne listove omogućila bi se brza, jednostavna i sigurna verifikacija autentičnosti i dokumenata. Upotreba modernijih materijala može doprinijeti uštedi u dugoročnom održavanju oružnih listova jer bi bili otporniji na fizičko oštećenje. Vjerujem da će stručna analiza omogućiti najbolje moguće rješenje koje će unaprijediti trenutni sistem izdavanja oružnih listova. Podnosim inicijativu prema Ministarstvu pravde i upravi Kantona Sarajevo, Kantonalnom tužilaštvu Kantona Sarajevo, da se u godišnjim izvještajima o radu Kantonalnog tužilaštva Kantona Sarajevo, koji se dostavljaju Skupštini Kantona Sarajevo na usvajanje uvrsti i dodatne informacije o disciplinskim postupcima pokrenutim protiv tužilaca tokom izvještajnog perioda. Informacije o pokrenutim disciplinskim postupcima omogućavaju transparentnost u radu Tužilaštva, ono pokazuje javnosti da su tužioci odgovorni za svoje postupke i da se svaka potencijalna nepravilnosti ili kršenje profesionalnih standarda razmatra kroz odgovarajući disciplinski postupak. Informacija o disciplinskim postupcima omogućila bi građanima da vide da postoje mehanizmi kontrole i da nije dopušteno neprihvatljivo ponašanje u institucijama koje provode zakon. Skupština Kantona Sarajevo kao nadležni organ koji usvaja godišnji izvještaj o radu Kantonalnog tužilaštva Kantona Sarajevo, treba da bude u mogućnosti da sagleda rad Tužilaštva u punom kontekstu. To uključuje ne samo koliko su efikasni u obavljanju svojih zadataka, već i da li su tužioci odgovorni za svoje ponašanje i postupke.“.

Zastupnica Admela Hodžić je podnijela sljedeće (citiramo): „Upućujem zastupničko pitanje Vladi Kantona Sarajevo, odnosno svim ministarstvima, javnim ustanovama, javnim preduzećima i svim ostalim ustanovama kojima se Budžetom Kantona Sarajevo obezbijede sredstva prema ekonomskom kodu 613 900, posebno naknada za podsticanje rehabilitacije zapošljavanja osoba sa invaliditetom i tražim da Skupštini Kantona Sarajevo dostavi odgovor, odnosno podnese izvještaj za proteklu godinu za koliko neuposlenih osoba sa invaliditetom je uplaćeno sredstava prema Zakonu o profesionalnoj rehabilitaciji, osposobljavanju i zapošljavanju lica sa invaliditetom. Član 18 najmanje jedno lice sa invaliditetom na svakih 16 zaposlenih dužni smo uposliti. I koliko je tih sredstava iskorišteno u odnosu na iznos predviđen Budžetom za 2024 godinu. I detaljnu informaciju koliko je osoba sa invaliditetom koristilo ova sredstva za navedene svrhe uplaćena u Fond za profesionalnu rehabilitaciju i zapošljavanje osoba sa invaliditetom. Detaljnu informaciju tražiti od Fonda za profesionalnu rehabilitaciju i zapošljavanje osoba s invaliditetom za sredstva koja su uplaćena iz Budžeta Kantona Sarajevo za 2024. godinu. I podnosim inicijativu Vladi Kantona Sarajevo i Ministarstvu za rad socijalnu politiku raseljena lica i izbjeglice Kantona Sarajevo da provedu sve potrebne procedure kako bi u institucijama u

Kantonu Sarajevo, Gradu Sarajevo i općinama Kantona Sarajevo u pravilnike s kriterijima za prijem radnika u radni odnos bio uvršten i član 15. Zakona o profesionalnoj rehabilitaciji, osposobljavanju i zapošljavanju lica sa invaliditetom, "Službene novine Federacije Bosne i Hercegovine" 9/10, odnosno da prednost pri zapošljavanju u subjektima iz stava (2) ovog člana u okviru javnog sektora imaju i lica sa invaliditetom, ako pored općih ispunjavaju i po posebne uvjete za radno mjesto“.

Zastupnik Mahir Dević je podnio sljedeće (citiramo): „Imam jedno pitanje za premijera, ministra privrede i ministra financija Kantona Sarajevo. Mi smo kao Skupština Kantona, čini mi se, u 2022 godini izvršili izmjenu Zakona o šumama na način da su sredstva za opšte korisne funkcije šuma ukinuta. Međutim, u trenutku ukidanja tih sredstava na računima budžetskim se nalazilo nekoliko miliona konvertibilnih maraka iz prethodnih godina sredstava koja su prikupljena. Pa ću ovo pitanje uputiti u pismenoj formi da mi se decidno odgovori gdje su ti milioni od opšte korisnih funkcija šuma potrošeni, tačno u koje projekte, šta je iz njih financirano i na koji način su ta sredstva realizirano. To pitanje ću, naravno, dostaviti i premijeru i ministru privrede i ministru financija u pismenoj formi. I imam jednu inicijativu koju pokrećem do sada, ja mislim jedno pet puta u zadnjih pet, šest godina. Ona se tiče izmjene zakona kojim bi se omogućila legalizacija bespravno izgrađenih objekata u Kantonu Sarajevo. Naravno, vi meni ovdje već pet godina, ovaj pet godina me zamajavate. I ovaj ministar koji je bio u pritvoru i onaj prije njega, i onaj prije njega i premijer dva, tri puta; za mjesec ćemo, za dva ćemo, za tri ćemo, za pet ćemo i tako je prošlo 5 godina. Prema tome, evo koristim priliku da kao zastupnik još jednom pokrenem tu inicijativu, prevashodno prema Vladi Kantona Sarajevo, da se taj Zakon nađe na sjednici Skupštine Kantona Sarajevo, konačno. Napomenut ću vas da držite Kanton Sarajevo u blokadi 6 godina. U tih 6 godina je napravljeno dodatnih 20 000 bespravnih objekata u Kantonu Sarajevo, a vi se pravite kao da se ništa ne dešava u sektoru izgradnje u Kantonu Sarajevo. Znači imate jedan potpuni haos. Također, u skladu s tim sam pokrenuo bio inicijativu, isto tako prema nadležnom ministru, kojeg nemamo, da se omogući građanima i tzv bespravni priključak na struju koji je dozvoljen u Federaciji da se isto tako uradi i za vodu. Znači, imate sada situaciju da ljudi mogu dobiti privremeni priključak za električnu energiju jer je to riješen nekom presudom Ustavnog suda, a paralelno s tim isti taj objekat ne može dobiti privremeni priključak za vodu, pa sam i to tražio od ministra da se ta praksa nekako ujednači, da se vidi da osnivač, da li preduzeća komunalna, da li općine daju neku privremenu suglasnost, međutim, ni to niste uradili, pa evo, koristim priliku da i tu inicijativu pokrenem, ali evo, nadam se da ćete valjda imenovati ovog ministra koji bi trebao da predloži ta zakonska rješenja“.

Zastupnik Samir Avdić je podnio sljedeće (citiramo): „Rijetke su prilike da smo saglasni kolega Dević i ja, al evo ja ću iskoristiti priliku da dam podršku ovoj inicijativi u vezi sa iznalaženjem zakonskog rješenja, boljeg zakonskog rješenja za konačnu finaliziranje procesa legalizacije i bespravno izgrađenih objekata individualnog stanovanja. I s tim u vezi naš tim, naša radna grupa unutar SDP-a i radi na jednom prijedlogu, pa evo da obradujem kolegu i da ga informišem, da ćemo uskoro izaći sa tim prijedlogom i prema Vladi i prema Skupštini i nadamo se njegovoj podršci. Moje prvo pitanje u vezi sa prodajom, masovnom prodajom novih knjiga na javnim površinama u Kantonu Sarajevo. Naime, Klubu SDP-a obratila se zajednica izdavača u Bosni i Hercegovini sa informacijama koje su onako prilično frapantne. Kada govorimo o ovoj temi, ne mislim na ulične prodavače polovnih knjiga ili udžbenika, iako bi, iako je i to vrlo zanimljiva tema kojom bi se trebalo pobrinuti Ministarstvo obrazovanja, s obzirom da je u određenoj koliziji prodaja udžbenika na ulici sa projektom, odnosno programom besplatnih udžbenika za učenike u Kantonu Sarajevo, ali to je druga tema. Ja ću se vratiti na ovu prodaju koja je najvidljivija na velikim, da kažem, relativno velikim javnim površinama ispred Arije, odnosno bivšeg BBI ili SCC-a i sličnih, pa se obraćam Tržišno- turističkoj inspekciji sa pitanjem da li su u posljednjih pola godine pola godine imali intervencija u vezi sa tom prodajom, da li su

kontrolisali prodaju i na šta su ustvari naišli zbog toga što prema informacije koje smo mi od zajednice dobili, te knjige su ustvari nove knjige koje se nelegalno donose, uglavnom iz Srbije, bez uvoznih dokumenata, neke od tih knjiga novih koje se prodaju se umnožavaju ilegalno, većinom na području Republike Srpske, nemaju pravilno deklarisanu artiklu, ne izdaju se bilo kakvi računi za prodati u robu, nemaju istaknut naziv prodavca, što je obavezno i prilikom ulične prodaje, nisu PDV obveznik i zbog te navodne utaje različitih poreza stvara se nelegalna konkurencija koja otežava rad našim legalnim knjižarama u Kantonu Sarajevo i dovodimo njih, ukoliko to ne riješimo, u neravnotežan položaj u odnosu na, pardon, te obrte, te firme iz Brčkog i iz Prijedora. Znači pitanje prema Tržišno- turističkoj inspekciji”.

Zastupnik Jasmin Šaljić je podnio sljedeće (citiramo): „Imam pitanje za predstavnika Ministarstva unutrašnjih poslova. Kakav je status policajca koji je uz gusle širio nacionalnu i vjersku netrpeljivost, koje ste mjere poduzeli? Je li suspendovan, ako je suspendovan je li protiv njega, osim disciplinske odgovornosti, pokrenut, pokrenuta i krivična prijava? Ono što javnost zna, on je, vi ste njega poslali na prinudni godišnji odmor. Molim vas da nam odgovorite usmeno. Drugo pitanje. Za Ministarstvo komunalne privrede infrastrukture prostornog uređenja građenja i zaštite okoliša. Znamo da je tačka dnevnog reda danas je ministar koji treba da zamijenimo, ali ima tu neko ko mijenja. Jeste li upoznati da je u naselju Rosulje, u zgradi koju je izgradio Fond Kantona Sarajevo za izgradnju stanova, a koje je finansirao Kanton Sarajevo, šehidske porodice, porodice poginulih pripadnik Armije i nestalih pripadnika, plaćaju vodu i komunalije po 3 puta skupljoj cijenu, kubik vode plaćaju umjesto 0,70 feninga, 2,18. Iz Vodovoda vrše obračun kao da su u pitanju poslovni prostori i firme.

I imao sam jednu inicijativu. Mahire ti vidi, koliko imam vremena? Pokrećem inicijativu od Skenderije do Vijećnice imamo 9 mostova. Pokrećem inicijativu prema svim relevantnim parlamentima, skupštinama, komisijama, da imena i nazive tih Mostova dodijelimo po naših 9 heroja odbrane oslobođilačkog rata“.

Zastupnik Redžo Lemezan je podnio sljedeće (citiramo): „Pa evo na fonu ovoga što je kolega Dević govorio u potpunosti se slažem s inicijativom i da podsjetim i ovu Skupštinu, a i premijera i Vladu, da smo tadašnji kolega zastupnik Irfan Čengić, a današnji načelnik Opštine Stari Grad i ja podnijeli inicijativu donošenja Zakona o legalizaciji, prije nekih po 18 mjeseci, da još nismo dobili odgovor na tu temu i mislim stvarno evo kada se usvoji budžet i kada završimo ovo što nam je hitno, da se ova Vlada treba posvetiti tome. Preko 30 ili 40 000 čak objekata je nelegalno, odnosno u statusu te neke legalizacije i ti ljudi očekuju rješenje svog problema. Također, kolega Dević je rekao za priključak za vodu da ne može privremeni. Ja dodajem inicijativu i podnosim inicijativu da uz vodu se doda i privremeni priključak za gas, jer nije moguće da, nije ni normalno, da jedno može, drugo i treće ne može. Ukoliko riješimo prirodni priključak za gas, pored ovoga za vodu sigurno ćemo imati jedan energent na koji će se ljudi zdravije grijati i imat ćemo čistiji vazduh itd. Itd. I sve ono što vam je realno produkt u onim zimskim danima. Tako da molim vas da u izmjenama Zakona o postornom uređenju uvrstite i ovu inicijativu u predložene izmjene”.

Zastupnik Damir Marjanović je podnio sljedeće (citiramo): „Nije pitanje, nego je zamolba. Molba prema Ministarstvu odgoja i obrazovanja da mi u pismenoj formi dostavi spisak udžbenika odobrenih u školskoj 2024/25, ali sa godinama njihovog izdavanja, u stvari sa godinama njihovog kreiranja, da budem precizniji. Ovdje tabele koje imam, vidim ko je autor, vidim kako se zovu udžbenici, ali na žalost i zbog ovoga spiska koji ja imam, možda tražim na pogrešnom mjestu, ne mogu da vidim kada je taj udžbenik kreiran. Jednostavno me zanima da vidim koliko apdejtirano znanje pružamo našim dječacima i djevojčicama u osnovnim, pa i u srednjim školama“.

Zastupnik Muamer Bandić je podnio sljedeće (citiramo): „Imam jednu zastupničku inicijativu prema Ministarstvu zdravstva Kantona Sarajevo i Javnoj ustanovi Dom zdravlja Kantona Sarajevo da obezbijedi službu za laboratorijsku dijagnostiku, odnosno uzimanje krvi za laboratorijski nalaz u sklopu ambulate Velešići. Predmetnom inicijativom tražim da su istoj ambulanti u Velešićima obezbijedi još jedan ljekar porodične medicine. U naselju Velešići živi jako veliki broj stanovnika, a posebno starije životni dobi i narušenog zdravstvenog stanja kojim usluge porodične medicine pruža ambulanta Velešići, u sklopu koje se sve do početka pandemije covid nalazila služba za laboratorijsku dijagnostiku. Kako se radi o velikom broju osoba starije životne dobi, boračkoj populaciji, šehidskim porodicama, postoji sve izraženija potreba da ova zdravstvena usluga bude vraćena u ambulantu Velešiće. Usluge porodične medicine u toj ambulanti pružaju dva doktora porodične medicine koji rade u dvije smjene i u prosjeku za jednu smjenu ljekarskih usluga pruže oko cca 80 pacijenata. Ukoliko znamo da bi optimalan broj pregleda u jednoj smjeni bio 20 do 25 pacijenata, dovoljno govori o potrebi za još jednim doktorom porodične medicine u ovoj ambulanti. Zbog svega navedenog pokrećem inicijativu prema Ministarstvu zdravstva Kantona Sarajevo i Javnoj ustanovi Dom zdravlja Kantona Sarajevo da u što kraćem roku i u sklopu ambulate Velešići obezbijedi službu da laboratorijsku dijagnostiku, odnosno uzimanje krvi za laboratorijski nalaze i u istoj ambulanti obezbijedi još jednog, trećeg ljekara porodične medicine. Imam jedno pitanje za Ministarstvo privrede Kantona Sarajevo. Neisplaćeni poticaji za četvrti kvartal 2024 godine, koji su trebaju biti isplaćeni do 31.01.2025. godina. Podsjetit ću da je proljetna sjetva skoro počinje i treba nabaviti repromaterijal, poljoprivrednici su vezani agro rokovima, a još uvijek nije donesena odluka o poticajima ni za 2025. godinu, a već je kraj prvog kvartala i počinje drugi kvartal 2025 godine. Još ću samo zamoliti, predsjedavajući vas, ja sam podnio inicijativu da mi sve institucije iz oblasti Kantona Sarajevo dostave izvještaj o zaključenim ugovorima o djelu. Okolnost da nisam dobio od svih institucija, tražio sam od Ureda za borbu protiv korupcije jednu takvu informaciju, međutim one institucije koje su me uputile na njihov portal, kada sam pogledao njihove unesene u tom portalu i one koje sam dobio nisu baš bili kompatibilni, odnosno neki ili nisu uneseni ili stranica nije na najbolji način ažurirana. Iz tih razloga one institucije koje mi nisu dostavile, zamolio bih zaista jer je inicijativa usvojena da jednu takvu inicijativu realiziraju“.

Zastupnik Davor Čičić je podnio sljedeće (citiramo): „Ja sam za ovu sjednicu pripremio pet inicijativa, ali evo, zbog vremena ću prezentovati samo jednu. A tiče se inicijative prema Ministarstvu za nauku, visoko obrazovanje i mlade, a tiče se sufinansiranje, odnosno dajem zastupničku inicijativu da Ministarstvo sufinansira licenciranje Univerziteta u Sarajevu za rad neophodnim proizvodima kompanije Microsoft kroz zaključivanje (nerazumljivo) ugovora između Univerziteta u Sarajevu i kompanije Microsoft. Naime, u prethodnim godinama i predstavnici Vlade Kantona Sarajeva, Univerziteta u Sarajevu su obavili niz raznih sastanaka sa lokalnim i regionalnim predstavnicima kompanije Microsoft s ciljem institucionalnog rješavanja licenciranja i nesmetanog korištenja proizvoda kompanije Microsoft kako bi se sistemski riješilo korištenje istih od strane cjelokupnog Univerziteta u Sarajevu, koji bi pored računara koje koriste nastavnici i saradnici, obuhvatio računare koje koristi nenastavno osoblje, računare u laboratorijama, salama fakulteta, akademija, instituta te serverska rješenja i Microsoft alate koji se koriste u nastavi, kao i pitanje licenciranja i Microsoft servisa za studente Univerziteta. Do sada su članice Univerziteta zasebno rješavale ovo pitanje na različite načine, pa je po meni pitanje sistemskog pristupa rješavanju ovog problema jako bitno i zbog unificiranja licenci i mogućnost njihovog korištenja na cijelom Univerzitetu u Sarajevu, tako i zbog potencijalnih ušteda u ugovaranju jedinstvenog paketa za cijeli Univerzitet u odnosu na sklapanje pojedinačnih ugovora svake pojedinačne članice. Na tim razgovorima ponuđena je opcija potpisivanja tog općeg sporazuma Univerziteta u Sarajevu sa Microsoftom, po tom principu (nerazumljivo) ugovora. Prednost, to je takav tip ugovora je jednostavan i dugoročno je isplativ oblik licenciranja koji akademskim institucijama osigurava dostupnost svih proizvoda obrazovne platforme sa

ugovorenim godišnjim brojem korisnika, kao i pristup punom paketu Microsoft proizvoda i usluga i to jednako za profesore, saradnike nenastavno osoblje i studente. Jedna od najvećih prednosti ovakvog ugovora licenciranja na razini Univerziteta je da omogućava besplatne licence za do 40 studenata po jednom licenciranom nastavniku, tj ukoliko se potpiše ugovor na razini Univerziteta za nastavno i nenastavno osoblje tada će i svi studenti Univerziteta u Sarajevu dobiti istovjetan paket usluga besplatno, što smatram da je jako dobro za sve studente. Suštinski, kao najznačajniji aspekti ovog ugovora omogućava se Microsoft 365 paket za preko 26 000 korisnika, odnosno osoblje Univerziteta i studente, na raspolaganju imaju puni Office 365 MS Windows licence, što je jako važno Univerzitetu i po pitanju korištenja ostalih servisa koji se veže na ove, ove licence. E-mail sam 100 MB mail boks, 100 gigabajta u mail boks, kao i mnoge druge prateće servise vezano za taj ugovor. Zbog toga šaljem ovu zastupničku inicijativu i smatram da bi ovaj tip ugovora koji bi Univerzitet u Sarajevo koštao oko 180.000 dolara, što je oko jedne marke i deset feninga mjesečno po korisniku, bio koristan za Univerzitet i ujedno bi napravio uštede, a ako u najmanju ruku bi još dodatno poboljšao kvalitet korištenja svih ovih alata koji se nude“.

Nakon iscrpljene liste prijavljenih za pitanja i inicijative, odgovore na postavljena pitanja su ponudili: *ministar zdravlja, Enis Hasanović, premijer Nihad Uk, ministrica pravde i uprave, Darja Softić-Kadenić, ministrica odgoja i obrazovanja, Naida Hota-Muminović i sekretar Ministarstva unutrašnjih poslova, Tarik Kršlak.*

Realizacija tačke dva.

AD-2.

Prijedlog Odluke o potvrđivanju smjene ministra u Vladi Kantona Sarajevo

Zastupnici su materijal dobili uz poziv za sjednicu. Uvodne napomene u svojstvu predstavnika predlagача, Komisije za izbor i imenovanja i administrativna pitanja, podnio je *predsjedavajući Elvedin Okerić*. Obrazloženje je također podnio i *premijer, Nihad Uk*.

U diskusiji su učestvovali zastupnici: *Mahir Dević, Faruk Selmanović, Marijela Hašimbegović, Miomirka Melank, Jasmin Šaljić, Vedrana Vujović i Muamer Bandić.*

U međusobnom repliciranju su učestvovali zastupnici: *Samir Avdić – Mahir Dević, Davor Čičić – Mahir Dević, Vitor Handžić – Faruk Selmanović, Elvedin Okerić – Faruk Selmanović, Muamer Bandić – Miomirka Melank, Mahir Dević – Muamer Bandić i Davor Čičić – Muamer Bandić.*

Zaključivši diskusije, predsjedavajući je predložio u skladu s članom 94. Poslovnika Skupštine Kantona Sarajevo, da se izjašnjenje po ovoj tački provede odmah, što su zastupnici jednoglasno podržali (s 20 glasova „za“).

Na osnovu rezultata glasanja, predsjedavajući je konstatovao da je Skupština jednoglasno donijela Odluku o potvrđivanju smjene ministra u Vladi Kantona Sarajevo. (s 21 glas „za“).

Na zahtjev Klubova S BiH, NiP i SDA, predsjedavajući je predložio pauzu u trajanju od jedan sat, što su zastupnici podržali većinom glasova (18 glasova „za“, 4 glasa „protiv“ i bez glasova „suzdržan“).

NASTAVAK NAKON PAUZE

Realizacija tačke tri.

AD-3.

Prijedlog Odluke o imenovanju pravobranioca Pravobranilaštva Kantona Sarajevo

Zastupnici su materijal za tačku dobili uz poziv za sjednicu. Uvodno izlaganje u svojstvu predlagača, predsjedavajućeg Komisije za izbor, imenovanja i administrativna pitanja, je podnio predsjedavajući, *Elvedin Okerić*.

U diskusiji su učestvovali zastupnici: *Marijela Hašimbegović, Mahir Dević, Muamer Bandić, Faruk Kapidžić i Elvis Vreto.*

U međusobnom repliciranju su učestvovali zastupnici: *Elvedin Okerić - Mahir Dević, Samir Avdić – Mahir Dević i Elvedin Okerić – Muamer Bandić.*

Ispravku krivog navoda su imali zastupnici: *Mahir Dević - Muameru Bandiću,*

Nakon diskusija, predsjedavajući je dao desetominutnu pauzu.

NASTAVAK NAKON PAUZE

Nakon pauze, predsjedavajući je obavijestio zastupnike da je u konsultacijama rukovodstvo Skupštine odlučilo da se prekida rad na sjednici, te da će zastupnici biti blagovremeno obaviješteni o nastavku iste.

Broj: 01-04-7589/25
14.03.2025.godine
SARAJEVO

Zapisnik izradila:

Lejla Kadrić

S E K R E T A R

SKUPŠTINE KANTONA SARAJEVO

Aida Zeković

P R E D S J E D A V A J U Ć I

SKUPŠTINE KANTONA SARAJEVO

Elvedin Okerić

ZAPISNIK
O RADU PRVOG NASTAVKA 20. RADNE SJEDNICE SKUPŠTINE KANTONA
SARAJEVO ODRŽANE 28.03.2025.GODINE SA POČETKOM RADA U 08,45 SATI

Prvi nastavak 20. Radne sjednicu Skupštine Kantona Sarajevo otvorio je predsjedavajući Elvedin Okerić (u daljem tekstu predsjedavajući).

Sjednici su prilikom otvaranja prisustvovali 22 zastupnice i zastupnika. Izostanak sa sjednice opravdala je zastupnica Danijela Kristić, dok je kašnjenje najavio zastupnik Adi Kalem. Sjednici nisu prisustvovali zastupnici: Bandić Muamer, Hodžić Admela, Izetbegović Sebija, Kapidžić Faruk, Pilav Ilijaz, Šaljić Jasmin, Zahiragić Haris i Zuhrić Albin.

U skladu s naprijed navedenim, prisustvo zastupnika Prvom nastavku 20. Radne sjednice je bilo sljedeće:

SDA - STRANKA DEMOKRATSKE AKCIJE

1. Dević Mahir
2. Selmanović Faruk
3. Viteškić Smiljana

POLITIČKA ORGANIZACIJA "NAROD I PRAVDA"

1. Čampara Aljoša
2. Mehmedagić Mersiha
3. Okerić Elvedin
4. Pobrić Rusmir
5. Vreto Elvis

SOCIJALDEMOKRATSKA PARTIJA BOSNE I HERCEGOVINE

1. Avdić Samir
2. Čičić Davor
3. Kapo Belma
4. Pekić Jelena
5. Petrović Kristina

POLITIČKA ORGANIZACIJA GRAĐANA "NAŠA STRANKA"

1. Bešlija Vildana
2. Handžić Vibor
3. Klarić Sanela
4. Melank Miomirka

STRANKA ZA BOSNU I HERCEGOVINU

1. Gavrankapetanović – Smailbegović Fatima

DEMOKRATSKA FRONTA

1. Hašimbegović Marijela
2. Vujović Vedrana

SAMOSTALNI ZASTUPNICI

1. Gaković Elza
2. Lemezan Redžo
3. Memić Arijana

Nakon intoniranja državne himne, predsjedavajući je pozvao zastupnice i zastupnike da odaju počast pripadnicima Armije R BiH i MUP-a R BiH koji su dali svoje živote u odbrani od agresije na Bosnu i Hercegovinu, svako na svoj način.

Potom je uputio pozdrave zastupnicama i zastupnicima u Skupštini Kantona Sarajevo, članovima Vlade Kantona Sarajevo, svim prisutnim u sali, kao i predstavnicima medija koji prate rad sjednice.

Predsjedavajući je podsjetio zastupnike da su na prethodnom zasjedanju obrađene prve dvije tačke, a da je u okviru tačke 3. Dnevnog reda koja glasi: „Prijedlog odluke o imenovanju pravobranioca Pravobranilaštva Kantona Sarajevo“, podneseno uvodno izlaganje predlagača, provedena rasprava, tako da se ovo zasjedanje nastavlja izjašnjavanjem po navedenoj tački.

Na osnovu rezultata glasanja, konstatovano je da je Skupština većinom glasova donijela Odluku o imenovanju pravobranioca Pravobranilaštva Kantona Sarajevo (s 19 glasova „za“, bez glasova „protiv“ i 3 glasa „suzdržan“).

Potom je predsjedavajući pozvao novoizabranog pravobranioca, *Samira Termiza*, da položi svečanu izjavu prije stupanja na funkciju, nakon čega mu je čestitao i poželio sretan rad.

Konstatujući da su iscrpljene sve tačke dnevnog reda, predsjedavajući se zahvalio zastupnicima i zaključio rad na 20. Radnoj sjednici Skupštine Kantona Sarajevo.

Broj: 01-04-7589/25
28.03.2025.godine
SARAJEVO

Zapisnik izradila:

Lejla Kadrić

S E K R E T A R

SKUPŠTINE KANTONA SARAJEVO

Aida Zeković

P R E D S J E D A V A J U Ć I

SKUPŠTINE KANTONA SARAJEVO

Elvedin Okerić

- 0 -

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.